



Karen Marie Kyed Frederiksen, Demokratit
Inatsisartuni ilaasortaq
Inatsisartut@ina.alla.gl

Imaatigut angallassineq pillugu § 37 naapertorlugu apeqquteqaammut 2025-064 akissut

Dato: 08-07-2025
Sagsnr.: 2025 - 13045
ID. nr.: 98479046

Asasara Karen

Inatsisartut suleriaasianni § 37 naapertorlugu imaatigut angallassineq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Kalaallit Nunaannut Kalaallit Nunaanniillu immakkut assartuinerup inerisarnissaanut Naalakkersuisut sunik pilersaaruteqarpat?

Akissut: Nuna tamakkerlugu immakkut assartuinerup inerisarnissaanut Naalakkersuisut Royal Arctic Linelu ataavartumik suleqatigiipput, nioqqutissanik pilersuineq nuna tamakkerlugu aalakkaaniassammat aamma siumut nalunngereerneqarniassammat. Imaatigut angallassineq ilaatigut sikoqassuseq umiarsuillu containerinik inissaqartitsinerat eqqarsaatigalugit ataavartumik allanngortinneqartarput.

Ilaatigut Naalakkersuisut Royal Arctic Linep Imaatigut angallassinermut Akuersissutaat misissorsimavaa kiisalu Amerikallu Avannarliup akornanni imaatigut angallassineq periarfissaqarnersoq. Misissuinerit kinguneqanngillat imaatigut angallassinermut akuersissutaata atuukkunnaartinnissaanut imaluunniit Kalaallit Nunaata Amerikallu Avannaata akornanni angallassisalernissamik pilersitsisoqarnissamik.

2022-mi ukiakkut ataatsimiinnermi immikkoortoq 70-mi Naalakkersuisut peqquneqarput Royal Arctic Line-p assartuinerup kisermaassisuunera atuukkunnaarsinneqassappat pitsaaqutissat ajoqutissallu misissussagaat. Misissuineq Kukkunersiusoqarfimmit PwC-mit suliarineqarpoq Inatsisartunullu agguanneqarluni november 2024-mi. Misissuinerup quppernermi 6-imil ilaatigut inerniliisoqarpoq:

“Imarpikkut angallavimmit tapiissutinik nuutsisoqarsinnaanngippat angallaviit sinnerisa tamarmik negativimik 300 mio. DKK-inik EBITDA-qartut aningaasalersornissaanut allanik periarfissarsiortaqariqassaaq.”

Misissuineq tamanut ammavoq aamma Naalakkersuisut.gl-mi kiisalu Kanat.gl-imil takuneqarsinnaavoq. Misissuinerup siunertaraa tassunga tunngasumik siunissami naalakkersuinikkut oqallisiginninnermi tunngavissaqarnissaq, taamaalillungalu tassunga tunngasumik soqutiginnittut tamaasa misissuineq pillugu atuaqqullugu.

Misissuinerup takutippaa Royal Arctic Linep nunaqarfinnut angallassinerat kisimiitillugu aningaasatigut attanneqarsinnaanngitsoq, taamaalilluni assartuinissamut sullissinissamik

akuersissut atuukkunnaarsinneqassappat kinguneqassasoq Nuummut assartuineq akikinnerungaatsialissasoq, kisianni assartuinermi aningaasartuutit innuttaasut sinnerusunut akitsungaatsiassasut. Isorliunerusunut Naalakkersuisut isorliunerusuni inuuniarnikkut aningaasartuutit akitsungaatsiniarnissaat, taamaasillunilu innuttaasunut amerlasuunut inuunermi atugaasa ajorseriaernissaat akuerisinnaanngilara.

2024-mi aasakkut Naalakkersuisut aalajangerput nuna tamakkerlugu imaatigut assartuineq pillugu aamma assartuinissamut sullissinissamik Royal Arctic Linemut akuersissut sulisissorneqassasoq. Misissuinerit taakku sulis ingerlanneqarput.

Apeqquut 1a: Immakkut assartuinermit Royal Arctic Linep akuersissummik kisermaassinerata atorunnaarsinnissaanut Naalakkersuisut pilersaaruteqarpat?

Akissut:

Apeqquummut 1-mut akissut uuma qulaaniittoq takuuk.

Apeqquut 1b: Kalaallit Nunaata Amerikkallu avannaata akornanni immakkut assartuisarnissap periarfissinneqarnissaanut Naalakkersuisut pilersaaruteqarpat?

Akissut:

Apeqquummut 1-mut akissut uuma qulaaniittoq takuuk.

Apeqquut 2: Kalaallit Nunaannut Kalaallit Nunaanniillu suliffeqarfinnut innuttaasunullu immakkut assartuinermit akiliutip akikinnerulersinneqarsinnaanerani Naalakkersuisut qanoq eqqarsaateqarpat?

Akissut:

Innuttaasunut suliffeqarfinnullu imaatigut assartuinerup akiisa apeqquataatippaat aningaasartuutit allanngorartut aamma aalajangersimasut. Aningaasartuutit allanngorartut ilaatigut tassaapput containerit angissusii najoqqutaralugit aningaasartuutit aamma umiarsuarmik assartuinermi aningaasartuutit kiisalu umiarsualivinni passussineq. Aningaasartuutit aalajangersimasut ilaatigut tassaapput naafferaartumik akilersuutit kiisalu nalikilliliinerit aamma akissarsiat aamma uuliap akii, tassami umiarsuaq angalasussaavoq containerit amerlassusii apeqquataatinnagit. Aningaasartuutit ataavartumik naleqqussarneqartarput akikillisaaniarluni naalakkersuinikkut anguniakkat allat eqqarsaatigalugit.

Naalakkersuisut suliniutinik tigussaasunik imaatigut assartuinermi akikillisaasinnaasunik nalunaaruteqarsinnaanngillat. Suliniutitut siunnersuutinik angallassinermi aningaasartuutikillisaasunik – sullissineq ajorteriarnagu – Royal Arctic Linep aamma uanga soqutiginnilluta tusarusuttorujussuuvugut.

Apeqquut 3: Naalakkersuisut isumaqarpat, maannakkut Immakkut assartuinermit pilersaarut eqaannerpaamik inissisimasoq? Immakkullu assartukkat sukkanerpaamik eqaannerpaamillu apuuffissaminnut apuunneqartarlutik?

Akissut: Naalakkersuisut isumaqarput angalanissamut pilersaarusiaq maanna atuuttoq pitsaanerpaajusoq aningaasat tassunga atugassat eqqarsaatigalugit. Inatsisartut kissaatigippassuk assartuinermit aningaasanik amerlanernik aningaasaliisoqassasoq

soorunami Royal Arctic Line oqaloqatigineqassaaq kiffartuussinermi isumatigiissut ilaneqassappat.

Apeqquut 3a: Angallassinissamut pilersaarusiornermi aningaasat saniatigut suut pingaarnersiuiinermi isiginiarneqartarpat?

Akissut: Angalanissamut pilersaarusiornermi salliutinneqartartut amerlapput. Assartuineramik suliaqartumut angalanissamut pilersaarusiornermi suut attuumassuteqartuni salliutinneqartarnersut naammattumik nassuiaasoqarsinnaanngillaq, piffissarujussuaq nukippassuillu pisariaqatinneqassammata

Uma ataani assersuutit pingasut angalanissamut pillersaarutit katiternerannut siusinnerusukkut sunniutaasartut nassuiarneqarput.

Aalaakkaaneq aamma siumut nalunanngereersoq

Royal Arctic Line angalanissamut pilersaarutaa pingaarneq ima aqqissuunneqartarpoq sapaatit akunneri tamaasa nioqqutissanik nutaanik tikiussisarluni. Sapaatip akunneri tamaasa nioqqutissanik tikiussisoqartarnera suliffeqarfinnut pingaaruteqaqaaq pisiassaminik pilersaarusiornermi kiisalu suliffeqarfiup pisariaqartitai allanngussappata piffissap sivikitsup iluani nalimmassaanissamut.

Nerisassanik pilersuineq sapaatip akunnikkaartoq Naalakkersuisut naammagisimaaqaat. Nioqqutissanik nerisassanillu pilersuinerup aalaakkaasuunissaata siumullu nalunannngitsuuniissaata attatiinarnissaa Naalakkersuisunut pingaaruteqarpoq.

Naatitanik nutaanik pilersuineq:

Assersuutigalugu umiarsuit Nuummut tikinnissaat tulluarsarneqartarput sinerissamut angallassineq weekend aallartinnginnerani periarfissaqartinnerullugu. Taassuma pisiniarfiit pisariaqartitaat nioqqutissat weekend aallartinnginnerani pisiassanik peqarnissaannik ikorfartorpaa.

Misissuineq pillugu inatsisinik malinninninneq:

Umiarsuit qaqinneqarnissaat eqqarsaatigalugu Royal Arctic Linep angalanissamut pilersaarutaa pingaarneq suliarneqartarpoq. Royal Arctic Linep nunat tamat inatsisaat malittussaammatigit umiarsuaataat amerlasuut misissorneqartartussaapput. Angalanissamut pilersaarusiornermi 2025 tamanna aalajangiisorujussuuvoq.

Umiarsuit misissortillutik qaqeqqaneranni nioqqutissanik pillersuinermi peqataasinnaanngillat. Taamaattumik umiarsuit ilaat pilersaarummit peerneqarallartarput aamma angalanissamut pilersaarut 2025 pilersaarusiorneqarpoq qaqitsinerup nuna tamakkerlugu nioqqutissanik pilersuineq kinguarsassanngikkaa.

Apeqquut 4: Naalakkersuisut oqaluuserisamut soqutiginaatilinnik allanik

paasissutissiisinnaanerlutik?

Akissut: Apeqqummut 1-mut akissut takuuk.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

A handwritten signature in blue ink, consisting of several overlapping loops and strokes, positioned over the printed name.

Aqqaluq B. Egede